

ao, me nga heramana. I kotahi tonu te ahua o te Ingirihī raua ko te Marikena; ko Tiamani, i matakitaki. I te 11 o nga ra o Aperira nei 100 nga hoia o nga Marikena o nga Ingirihī i haere ki te tiro i te takoto o te whenua. Kore rawa atu he maori i kitea e ratou. I te hokinga mai ka mahue te one i haere atu ai ratou, katahi ka hoki mai ma roto i tetahi ngahere kokenata. Hei konei ka pūbia kohurutia ratou e nga hauhaui, i muri, i runga hoki i nga kokonata. Na tetahi Tiamani i ki mai kaore rawa he hauhaui i kitea e ia. I te kumenga a Rewhetei Landsdale i ta ratou repo kore rawa i paku, a i a ia e wewete ana i taua repo ka tu ia. Katahi ka tangi te pikara karanga kia oma ki te one, ki te wahi watea, otira e whitu o ratou i mate, e toru a-piha, e wha paraiwete. Nga apiha i mate ko te Rewhetei tuatahi o te Tauranga, ko Freeman; ko te Rewhetei tuatahi o te Philadelphia (Marikena.) ko Landsdale, me tonu hōa apiha. I mate ai tenei na tona rohoanga ki te whakawaha i a Rewhe. Landsdale. I te kiteatanga o nga tinana i muri mai ko nga upoko o nga apiha kua oti te poroporo e nga hauhaui, ko nga taringa o nga heramana i tapatapahia. Kotahi tonu te poka i nehua ai enei tangata, nga Ingirihī me nga Marikena. Kei te mohio pea koutou ko tenei iwi ara ko te Marikena he Ingirihī ano. Nui atu te tangi o te tangata i te nehunga o enei hoia. I panga putiputi katoa nga wahine Maori ki roto i to ratou poka. Te karakia o te nehunga ko te karakia o te Hahi o Ingarangi. Ko te kara a te Kuini, me ta Amerika i herea. Ka oti te tapuke ka kitea nga mahunga o nga apiha, na etahi pirihī Pikopo i mau mai. I hahua ano nga tupapaku a whakapiria ana nga mahunga, katahi ka nehua ano. Kotahi ano te wiki o te marenatanga o Rewhe. Landsdale ka tonoa mai nei tona kaupuke ki Hamoa. Kei te tangi te wahine i muri na: ka aroha hoki.

R. T. Mokena Kohere.

TE AROHA.

E iwa nga whewehenga o te Aroha e whakaaturia ana e Paora i te 13 o nga upoko o tana pukapuka tuatahi ki nga tangata o Korinithi. E te kai korero korerotia taua upoko, me te inoi atu ki te Atua kia homai taua aroha ki a koe e Tona Wairua Tapu.

1. *He Manawanui te Aroha.* (rarangi 4.) He manawanui ki nga tukinotanga a te tangata, ki nga whiunga a Ihova ki nga mate, ki nga

mamaetanga. E manawanui ana te whaea ki te whakatipu i ana tamariki. "Ma te manawanui e mau ai o koutou wairua." (Ruka 21, 19). Tirohia Hemi 5, 11.

2. *He Atawhai te Aroha.* (ra. 4.) He atawhai ki nga tangata katoa, ehara i te mea ki nga hoa, ki nga rangatira, ki nga manuhiri kaingakau, ki nga whanaunga anake. He maha nga Maori kaore e hoko kai pai ana ma ratou tamariki engari hei nga manuhiri maringi ana te moni, mate ana nga hipi, me nga kau. Tiro. Epeha 4, 32.

3. *Kahore e hae te Aroha.* (ra. 4.) Pohehe ai etahi tangata he kaingakau, he aroha no ratou ki a ratou wahine i hae ai ratou. "E kore te aroha e hae." Ko te hae tetahi mea weriweri atu i te ao. He tini nga kohuru kua oti i runga i te hae. "He mea nanakia te riri, he rutaki te aritarita; ko wai ia e tu ki mua i te hae?" "He pirau ia te hae ki nga wheua." (Whakatau. 27, 4; 14, 30). Tiro. i Pita 2, 1.

4. *Kahore te aroha e whakaiti.* (ra. 4.) Tetahi o nga tino tohu o te Karaitiana ko te ngakau humarie. I mea a te Karaiti, "He ngakau mahaki hoki toku, he ngakau papaku." E whakaiti ana te tangata mona kakahu, mo tona ahua, mo tona rangatira, mo nga mea nunui e taea e ia. He maha nga Maori e kite ana ahau e whakamatakitaki ana i nga mea nunui e taea ana e ratou. Ehara te tangata whakahi i taputapu.

5. *Kahore he tikanga whanoke o te aroha.* (ra. 5.) Ko ana tikanga ko nga tikanga rangatira, he ngawari. He tino rangatira etahi Maori ware, he tino ware nga tikanga a etahi rangatira.

6. *Kahore a whati ki ana ake te aroha.* (ra. 5.) Kaore e whai ko ia tonu kia whiwhi ko etahi atu hei aha ma wai. He tangata weriweri te tangata apo. Ki a pera me te Karaiti kihai ia i whakaaro ki a ia ake. Rapua te ora, te pai, te hari mo etahi atu, a he nui te ora, te pai, te hari e puta mai ki a koe. "Kaua tana ake e tirohia e tetahi." (Piripai 2, 4, 21).

7. *E kore e riri wawe te aroha.* (ra. 5.) "Kia riri, a kau e hara." Ko etahi tangata he rite ki te paura, pa kau atu te maati kua paku. I rongu au i tetahi wahine Maori he kohete tonu tana korero ki ana tamariki i nga wa katoa. Mehemea e tae ana ia ki te rangi tera e kohetetia nga anahera. Kei te ngakau te he. Tiro. Whatauki 14, 17; 16, 32.

8. *Kaore e whakaiti ki te aroha.* (ra. 5.) He iwi kaha rawa te Maori ki te whakaiti he. He haere noa na te tangata ka kiia e te Maori, he haere ki te mea, ki te mea. Kei te noho hara-kore noa iho te tangata ka whakakino- ngia tona ingoa — na te kore aroha.